

摘藻堂四庫全書薈要

集部

欽定四庫全書
養要卷一萬六千一百二十二

集部

陵川集卷六

元 郝經 撰

古詩

和陶

和陶詩序

賡載以來倡和尚矣然而魏晉迄唐和意而不和韻
自宋迄今和韻而不和意皆一時朋儔相與酬答未
有追和古人者也獨東坡先生遷謫嶺海盡和淵明

詩既和其意復和其韻追和之作自此始余自庚申
年使宋館留儀真至辛未十二年矣每讀陶詩以自
釋是歲因復和之得百餘首三百篇之後至漢蘓李
始為古詩逮建安諸子辭氣相高潘陸顏謝鼓吹格
力復加藻澤而古意衰矣陶淵明當晉宋革命之際
退歸田里浮沈杯酒而天資高邁思致清逸任真委
命與物無競故其詩跌宕於性情之表直與造物者
遊超然屬韻莊周一篇野而不俗澹而不枯華而不

飾放而不誕優游而不迫切委順而不怨懟忠厚豈
弟直出屈宋之上庶幾顏氏子之樂曾點之適無意於
詩而獨得古詩之正而古今莫及也顧予頑鈍鄙隘
躑躅世網豈能追還高風激揚清音亦出於無聊而
為之去國幾年見似之者而喜况誦其詩讀其書寧
無動於中乎前者唱喁而後者和訛風非有異也皆
自然爾又不知其孰倡孰和也屬和既畢復書此於
其端云

停雲思歸也

停雲蔽日翳翳弗雨伊余懷傷自詒伊阻展轉拘幽莫
或念撫瞻望中原徙倚凝佇停雲悠悠蒸氣濛濛衝風
入室汹彼大江崩心震魄慨嘆北窓孰因孰極惟道是
從服仁佩義完節為榮之死靡它寔余之情寤歎弗寐
攬衣宵征載思子卿千載如生無媒取妻匪斧伐柯樂
禍深仇焉能為和生民無辜遭凶既多銷兵無期將奈
之何

時運 安命也

時運代遷既夕復朝我來幽都尼于江郊側佇風飈載
翔雲霄天澤弗流原田槁苗熱中熬熬孰沃孰濯密室
陰陰孰眷孰矚仰視俯察無愧則足知命何憂事天乃
樂在昔過魯風雩浴沂爰登岱宗曠然忘歸五夜觀日
神光發輝乃今坐井高蹤曷追太行之巔先人舊廬貞
松鬱林中堂歸如安得燕喜美酒滿壺否弗終傾壞運
屬予

榮木 觀物也

榮木青青英華若茲氣至而滋人亦如之變陽化陰物
各有時無莫無適夫道一而翳翳榮木云云歸根多華
早落幾何生存大冶通達乾坤為門深固有方封植倍
敦升聚退散載美載陋生基死涯信新屈舊大業弗藏
萬有自富造物忘物於焉有疚脩身事天莫敢失墜造
次九思局脊三畏學聖造聖希驥則驥純誠粹精遂入
獨至

贈長沙公族祖

述東軒老人也經之六世祖受學於明道先生至曾叔大父東

軒老道益大傳之先大父思而有作

世遠學傳道親族踈起宗大家罔不在初淵源益深歲月聿徂慨我寤嘆載思躊躇於昭東軒棣華新堂心授口說繡弓白璋習習和風冽冽清霜吾道有宗吾家有光一世師儒雲從志同洪河北南太行西東豬為湖湘流為淮江六經百氏包羅旁通邈予小子亦聞格言激揚餘波瞻仰故山宿草荒阡抱書潛然惠我後世伊余

之先

酬丁柴桑

自警也

孰使而行孰尼而止排難兩朝奔命千里終豈能必爰
契厥始稽山濤江覲為一遊隨甌半途十年隱憂豈作
咄咄祇賦休休來之坎坎天命悠悠

答龐參軍

始予年十六讀書於保塞鐵佛寺南
堂不解衣帶坐徹明者五年感而思

之為賦
是詩也

孤燈長明終夜誦書躋深凌高中心自如載汲載薪不

遑寧居惟梗伊蓬託處聚廬以道為富以德為珍勤以
脩身孝以事親師心造聖不資於人靜境神會伊顏孔
鄰窮年揭揭日夕孜孜力探自得何樂如之作為文章
暢為歌詩聲滿天地無為無思渾沌復鑿太極再分警
覺不寐怡然懽忻軼起遠蹈馭風騎雲萬動皆寂博我
以文一席五載默以道鳴弓旌下招遂成飄零遠奉信
函使于吳京故業委地朔南失寧熖熖古佛依依北風
深窓短檠時見夢中孰令一人乃異初終祇繫其逢載

飭厥躬

勸農

閔農也兵亂以來四民失業農病為甚因讀淵明勸農之作感而賦此

植天務本實惟農民力田効勤含淳守真代食惟賢勸
恤相因耒耜之益始活斯人每每原田奕奕黍稷雨暘
時若具來播植惟是穰蓂惟是稼穡倉庾惟盈斯人足
食爰自兵興魚涸處陸汙萊菑畬澆散純穆浚肌刮骨
騶音輒與塵逐婦役弗蠶夫征弗宿苛政蝟起紛更弗
久飢腸曷充獨耕無耦既空杼軸孰事畎畝流亡異土

隕涕博手食衆農寡安得不匱有年無種豐獲安冀盜
賊羣起餒死並至曾是司牧曾是無愧井地荒空眚俗
頑鄙逐末逞偽無復率履農為匪民犯繩越軌本既凋
傷政何由美

命子

感子也余生三十有五年舉四子而三天
馬季曰阿壽生四年矣而余使宋十二年

弗克撫育
感而有作

余家冀方遺風帝唐詩書是傳奕葉有光厥初受氏爰
自殷商由漢迄今載續載昌金源之亡屯盈禍周百口

九族竟不首丘父獨抱子脫死橫流敢望子孫復始公
侯嶽嶽樹立自別豬龍治經立學生人之功鬼抉神搜
天緘地封坦坦正道明明高蹤淪苗起宗暢根達柯乃
嗣乃續庭充府羅天不慙遺未阜而窳宛宛三穉遽委
蟲沙曷敢尤天祗自咎德阿壽始孩弗子去國川途阻
脩變故揆忒教之誨之於焉可得不成乎終何誕乎始
徒耀松楸謾驚閭里有子無子命數定止未能無情與
物悲喜既已奪去摻衫上聲之弗及亦既生存寧必成立

不孝之罪聖人所急大禹荒度亦憫呱泣物生不齊亦
各有時天弗私爾勿勞爾思魚腹子滿孰繁若茲螺羸
類我孰其使而林回棄壁厲夜求火不知其天祗解私
我失惡乎否得惡乎可坼裂啄食屬離是假孤館四鄰
擾擾嬰孩一死一生朝去暮來胡肖不肖胡才不才敬
恭脩身曷云悲哉

歸鳥

寓感也

歸鳥翩翩集于深林飛雲遥遥反彼高岑瞻望弗及實

勞我心重門擊柝闕于幽陰歸鳥翩翩深林于飛飛雲
遥遥高岑是依嗟我征夫曷云還歸瞻彼北辰翰音弗
遺翼翼歸鳥翱翔徘徊曳曳飛雲巖谷是栖鼓瑟鼓琴
云胡不諧孰為知音伊余孔懷翼翼歸鳥棲于故條曳
曳飛雲鬱其高標伊余南征翰平內交滔滔弗歸故山
夢勞

形贈影

萬象生道區受形各有時運會迭往來寢揚成壞之妙

合我初疑爾亦即在茲隱見陰陽中幻化無了期寤寐
一死生寂然匪為思我勞為有此爾苦勿涕泗請看聲
與嚮相隨復何疑大都本無有相贈徒費辭

影答并

靜陰乃道影範圍無巧拙大車轉通達轍迹豈能絕妍
醜君固有隨君非慕悅日月相代明豈能與君別思君
不如我君沒我不滅生死無加損得失豈內熱因物不
遂物原原靡衰竭君終復隨我茲時見優劣

神釋

出生死間妙物不自著物物弗為物超然變新故二
子一醯雞羊負相冒附成壞不在已安用相告語元陽
初化時靜一是存處在在靡方所悠悠無定住陶老信
達者得失委命數全神乃遺形種秫脩釀具一醉樂有
餘陶然忘毀譽醉夢曾勿辨町畦都削去既不將不迎
亦何憂何懼能逃世上名豈有身後慮

九日間居

憶九日登隄臺

高秋登隗臺悵然思樂生君臣洒落契千載稱榮名西
風菊花期日照黃金明青山遶故國白鴈遺燕聲佳時
動幽懷晏景催短齡浩歌正激烈樽酒時自傾故鼎反
磨室六雄競光榮督亢一寒蕪酒酣重傷情丈夫過主
知唾手成功名

歸田園居五首

憶登封盧溪幽居
唐盧鴻故居在焉

童穉遊鹿豕野逸便深山幽居遠世塵顓顓羲皇年盧
溪鬱巖阿繚壁涵清淵徵君始真隱種玉開石田幽人

競卜鄰聯落崎阻間竹木茅舍邊桑麻菊籬前三春牡

丹雨十月梅花煙

盧溪故居有徵君祠祠前牡丹甚盛背坐竹木間多古梅故云

孤雲

出遙岑顏日下層巔性與萬化寂身同天地間一從入
馬羈趨蹶寧復然

區中戰羣倫兩馬復掉鞅樂哉山
中人身世無妄想避世如避仇
納履遂長往耕鋤足衣食生聚
羅穉長含淳遂天真體胖心亦廣
底事綺里季出山真鹵莽

雨餘山色淨霜降木葉稀南澗拾
梨栗帶月吟風歸青

青路邊蘭細細侵裳衣飯飽睡亦足物我兩無違好山
無俗人林泉有真娛種秫足自釀高下開荒墟清溪侵
古屋況有高賢居綠竹掃山色竒木近千株鄰舍幾父
老話言皆純如相見即痛飲甕盎傾無餘酒酣藉月臥
清興欲凌虛云誰知此樂此樂世間無

攜酒招野人共飲清溪曲蔬藪總狼藉一醉萬事足苔
痕入窪樽林影上棋局月出盃更深不須更秉燭歸去
靜柴扉酣臥日已旭

中天太少室青滿洛陽陌三十六芙蓉舍此將安適嵐
光上晨曦秀色宜日夕攀躋景無窮養生地有隙不聞
車馬喧宣憚耕鋤役奔騰三十年樂事都敗績面目祇
自憎俗死竟何益

問來使同前

朝拾澗底松空翠冷潑目暮歸東籬下自種今秋菊清
泉洗碎月襟裾有清馥高臥幽夢長不覺黃粱熟

遊斜川憶西郎

江壩坐白頭自分如歸休十年不出戶夢憶西郎遊看
花當雷溪水合青山流泓澄潭洞豁容與浮輕鷗回抱
道明莊魏道明也玉翅開林丘西郎十二峰如列鳥翅見水經依依避秦人
桃源闢田疇遺我山中酒殷勤更獻酬花飛好鳥歌塵
世有此不醉踏石上水洒然濯百憂何年結茅屋歸去
便可求

示周掾祖謝同前

勞生役世物萬戚無一欣且拂冠上塵暫作山中人尋

春洞林深賞晤元有因遠嶺絕水登鳴泉隔花聞幽趣
方顧接轉側志劬勤醉歸語山家今年當卜鄰便送買
山錢結茅東澗濱

諸人共遊周家墓柏下

淵明柏下飲相與樂吹彈何異燔間乞安足以為懽總
為付任適得酒即開顏自同墓中人未死心已殫

怨詩楚調示龐主簿鄧治中

萬化一大路去來皆茫然孰能不由行踵武億千年委

順出脩阻煩憂尼崎偏淵明苦避俗中歲歸田園門前
柳生肘更不入市廛自謂羲皇人脩然北窓眠日月自
運會寒暑從代遷達道久已化宛在伯玉前作詩本無
怨高興浮雲烟樽酒且逍遙銜盃稱世賢

答龐參軍

釋魏斌念母

嗟嗟勿念思諄諄聽吾言孰不欲事親燕安樂鄉園王
事有去留載讀陟屺篇大孝五十慕義止從古然白地
內畧獲賦子有厄緣悠悠無了期鬱鬱安得宣精衛豈

填海愚叟難移山天定自勝人還歸會有年

五月五日作和戴主簿

重午書懷贈書
狀官苟正甫

壞運窘天步行人當厄窮兀坐數年華大火復當中盛
陽正發育一氣方盈豐草木各暢茂郊園融凱風我獨
少生意束臂待一終燒醪點昌菹強飲心尤冲江靜重
門深兵嚴四壁隆何日河陽縣闊步登平嵩

正甫孟州
人州治後

有平嵩閣余賜
田亦在是故云

連雨獨飲
新館久雨

悠悠孰主張
尼此真偶然
早歲喜學道
自致雲霄間
意欲凌八表
縹緲追飛仙
折翼隨江國
閉門悲漏天
宛在厄會中
不自我後先
乾坤漬塗泥
霑濕何時還
異域歲月速
轉首十二年
形神與化馳
欲辨復無言

移居二首

吾道即吾廬
仁義是安宅
苟能庇風雨
便可度朝夕
雖川十一遷
歲有餅在役
僦屋復分庭
處處置牀席
往年始定居
生聚絕勝昔
哭墓遽南來
昆親忍崩析

城南初定遷高架插書詩基構計久常中表塗墍之幽
窓置棐几道妙儼若思訪問復安身作休日四時束帛
賁門閭推挽忽在茲進退已不詳天命豈吾欺

和劉柴桑

釋宋琚念母

翫麟宋仲儀倚楹獨躊躇念母望北雲悵然憶家居湯
湯伊祁水想見先人廬為言我與子南來隋幽墟鄉園
入渺茫草木荒菑畬母氏倚門望無為執勤劬生男不
若女有子還如無王事靡私鹽義別無親疎嶽嶽守一

節乾乾斷百須道在母即存志當金石如

酬劉柴桑

長風動江色俛仰星一周蕭然步空庭葉落淒其秋復
命不事操燕山一田疇我亦慕高節終能同此不憂心
重鬱陶安得駕言遊

和郭主簿二首

勉馬德璘孔進

周公待昧旦大禹惜寸陰聖學如弗及神道開靈襟嗟
爾氣質成變化更張琴力奪造化幾炳烺異昔今尊德

始好問卓出衆所欽去就審且精取予酌與斟繫風捕
幽景扣寂求至音講習說麗澤琢磨朋盍簪踐形當自
得好高勿臨深

誠身乃事親行義貴全節清心不滯物月江夜澄澈味
腴須濟深窮理必詣絕天人一理貫胸次總羅列苟能
一德全即為萬世傑二子久事余旦旦提耳訣慎勿自
棄捐舍此無歲月

於王撫軍坐送客

秋夕遣懷以下並同

鴈啼霜江清人與卉木腓舍館極羈留感秋尤思歸已
胥客咸陽孰為賦無衣美人期好合願言遂相違宛轉
萬民命怵惕終夜悲坐起對孤影斜月流寒輝淒風
合酸辛迺然嘆稽遲天道本好生伊何獨予遺

與殷晉安別

昔游翰墨場渴日志尤勤遠探羲農高近詣周孔親屬
天耿長焰豈惟照四隣尸坐正冠裳暮夜達旦晨擬從
太極初再使乾坤分經世啓帝運立德開王春偶別燕

山月忽落吳江雲，悵然負初心。計拙良有因，妄動希時榮。何如安賤貧，撫膺祇自責。安敢復尤人。

贈羊長史

寥廓安得翔，沮澤多羅虞。蛩吟苦關心，雁足無來書。憶昔少年場，結佩遊通都。北嶺既再登，楚山亦常踰。搏酒生風雲，鞍馬走臺輿。鱸轉復虎躍，一世英豪俱投奔。誰使然奇蹤，日踟躕戶外。皆告絕跬步，無所如幽明。澹窓星夜氣，深庭蕪心折。萬緒繁邁閱，思舊娛紙上。認堯舜。

自笑幾何疎起來月中行滯鬱方一舒

歲暮和張常侍

渴中夜尤劇扣關汲新泉快飲沃肺肝四顧無與言白
髮照寒月素影亦何繁幽窓挽衣坐反責思尤愆胡不
蹈東海胡不餓西山覩然食不義忍辱待生還露氣淒
且清別恨相縈纏殷憂有時窮今夕是何年歲月肯我
與精魄隨化遷嗟哉胡不晨天乎其偶然

和胡西曹示顧賊曹

月出蔓草寒江聲動清颼窓戶漸槭槭淒其飄我衣孤
鴻悲遙天寥落片影微蟋蟀不在堂苦傍傷根葵運數
方厄窮氣序亦頽衰羈懷感尤深中宵涕重揮黃虞不
可攀周道何委遲嘯歌和淵明慨嘆有餘悲

悲從弟仲德

銀沙滿玉河界天清露零孤心正耿耿秋夜何冥冥念
我當屯凶不如初無生乃同不周折遽向東南傾猘毒
方弄兵好會其能成蕭蕭變齒髮冉冉頽年齡潮生夜

江高簷間動松聲心魄忽蕩搖攬衣步中庭幽蹤獨往
來慘淡關山情未信天為人更著影問形我本不欺人
萬折氣益盈

始作鎮軍叅軍經曲阿

青苔入室深蝸涎縈素書坐席凝陰塵形骸久塊如臀
困磔株木冥升躋天衢投膠止河濁自笑真迂踈羈魂
重凌競枯腸謾縈紆一榻不復移轉首十年餘空期汗
漫遊慨想山澤居兀兀几上肉喁喁釜中魚有物皆恣

睢而我獨囚拘安得天地風吹上太行廬

庚子歲五月中從都還阻風於規林二首

逼窄片天月照我江濱居閤然六用絕孤影獨于于屋
漏重反觀面壁復向隅幽明無二道得喪歸一塗康莊
馭軒車豈能適江湖挾山以超海過計元自疎憂違付
順適樂地儘有餘天運誰能逃忿懣將何如

南北信命絕欲行將安之家人歌戾戾遊子無還期門
前大江橫潮來不違時日月相代遷我獨何在茲細和

淵明詩載歌歸來辭知命不必憂樂天復何疑

辛丑歲七月赴假還江陵夜行途中作

茲心乃活物探蹟還搜冥遂知天地幾洞見古今情
樂禍多下石復故誰班荆嗟嗟何不辰普閭誤此生
老樹棲驚鳥江靜秋月明顧影無匹儔徙倚恨不平
空庭步數週肅肅成宵征河陽有賜田何日得歸耕
自顧灑落恣而乃重纏縈當處不可出誤我祇世名

癸卯歲始春懷古田舍二首

禍隆殺戮運民命殲蹂踐赤手與天爭跋扈其能免更
深不成眠反側懷念緬世路劇翻倒喜惡還病善擾擾
人為多邈邈天道遠寒暑迭代遷潰亂胡不返自與鄉
隣鬪嗟我識慮淺

先君貽詩書繕性安賤貧每戒躁與速重勗敬以勤尤
惡名太早不許交時人守道業惟舊充誠德自新粟盡
義不渝闔門亦懽欣伊顏遽學步鄒魯頻問津友愛撫
弟昆仁賢是親鄰宛若故山家陶唐有遺民

乙巳歲三月為建威叅軍使都經錢溪至日雪

夜窓密有聲庭阿遽深積誰知大江頭却似窮海昔鷗
鳥暗不鳴羈鴻斂雲翮乾坤一模糊玉氣皓無隔嗟余
雪國來十年一行役體髮久已變茲心獨難易真宰豈
仇予運數會崩析途窮歲亦窮真標見松柏

還舊居庭草

客居久為家十載猶未歸蔓草上階除委碧生恨悲相
看辨時節夢寐荒是非昔時車馬多難去一無遺今來

斷行跡愛玩常相依榮瘁雨暘中凋腐寒暑推露綠感
春芳霜黃怨秋衰藉步柔且佳關心涕長揮

戊申歲六月中遇火萱

南風青鳳尾擁翳當庭軒金觚碧玉筵呀折如焚燔深
叢駐長夏次第開後前北堂昔養母家人欣聚圓對花
舞斑衣暫出轍遽還懽顏每為開太和回一天一從哭
墓後去國十二年年見新花永日相對閒忘憂却生
憂所賴志義堅夕步拾落英丹蕤滿芳田感創復臥思

蒼茫不成眠故叢誰剪移祇應滿西園

己酉歲九月九日黃葵

清標倚西風零亂七月交天宇始霽肅卉木方瘁凋停
停展嬌黃獨爾風度高金盃困側露綠蓮嫩干霄脩然
對仙花頓覺忘憂勞開樽坐踈影渴飲劇沃焦折來插
愁鬢兀醉從陶陶日上復盛開更須醉明朝

庚戌歲九月中於西田獲早稻

芙蓉

久客未還返殷憂徒多端對花復舉盃暫得心田安笑

容如美人盛容耐闕觀愁紅漬粉深醉臉傷春還上日
嬌暈滋依風翠綃寒含涕有深思欲言還羞難露重膏
沐新低頭淚闌干無情似傷情使我凋朱顏載歌更獻
酬物我何相關起來拂花舞不復為嗟嘆

丙辰歲八月中於下潁田舍獲菊

霜菊有正色堆積深庭隈綠蘂粲金屑清香動幽懷願
言窮節士氣韻相與諧亦有玉華鳳豈無紫冠雞俗死
委蔓草繞叢日百迴屈子餐落英至今辭賦哀淵明折

滿把嘯傲東籬開
余今手自種坐俟
星火顏依風日吟
哦天道孰違乖
最憐把露蛩寒夜
同幽栖

陵川集卷六

欽定四庫全書薈要卷一萬六千一百二十三

集部

陵川集卷七

元 郝經 撰

古詩 和陶

飲酒

順適皆坦途忘機信所之天地與化遷焉能獨違時酒
中有深趣真樂良在茲痛飲忘形骸物我兩不疑每笑
蘓學士漫把空盃持

謝安曠達士攜妓遊東山蒼生如我何勸我真狂言樽
中酒常有縱飲當窮年此樂醉者知難為醒者傳

道在盃杓中有物都無情一醉還天藏豈將飲為名嗟
嗟帶羈人勞勞失此生自著徽墨纏仍因寵辱驚枯腸
歸高岡渴死竟何成

武帝燒黃金玉殿紫烟飛終下輪臺詔創然徒傷悲侈
心與物競詣絕無所依血氣有壯瘁困憊終還歸醉鄉
萬事和悠悠無盛衰有酒當共飲獻酬莫相違

好酒無惡客合席語喧喧銜盃相爾汝共酌何黨偏秋
月流金樽春風顏玉山便作無懷民坐使唐虞還酒盡
任去留醉眠都無言

詩因酒更多真境發精英爛熳醉後言舉是醒時情百
川飲長鯨千觚都一傾我亦如劉伶終當以酒鳴百年
都幾何不飲安用生

上春東風和百卉呈媚姿家家社甕熟相喚插花枝此
時酒無算盡發胸中奇醉人臥花間陶然亡云為不飲

彼何得祇自強拘羈

西風黃葉落處處菊花開霜螯味滿殼持盃亦開懷正
當劇飲時惟恐與時乖快意傾灑灑無復念栖栖金英
既狼籍人亦醉如泥我順物安忤兀兀靡不諧悠然反
化初世路都沈迷駕言入醉鄉麴車不可迴

夜醉曉來醒日出東南隅嗟嗟早行人百里已半途我
祇孰為客彼亦孰為驅飲酒有運數生平酒常餘賜田
總種秫終傍淵明居

屈子重違天陶公乃達道遙遙隙中駒放盃身已老欺
為畫餅欺遂使腸枯槁君看桃花顏得酒色更好榮名
身後事美酒樽中寶一飲便成仙御風凌八表

我愛李太白醉眼高一時把盃問明月揮灑多文辭吾
生嗜盃酒感寓實在茲常向醉中醒更飲不復疑載讀
止酒詩陶公亦吾欺安得泛酒海弄月恣所之

壺中別一天飲之造真境有夢渾未覺獨醉勝獨醒忘
物神乃會放懷道即領巨壑當藏舟括囊勿脫頰為告

不飲人此理天日炳

好事邀我飲布席我已至散談坐生風引滿即徑醉快
意無町畦縱衡不比次忘情釋重負適已乃為貴世上
多虛名樽中有真味

種柳復藝菊即是陶潛宅眼中總孟杓門外無轍跡朝
飲仲尼千夕醉季路百不用五斗解豈計東方白熙然
識此生獨醒真可惜

五年一龕燈面壁初治經仇酒恐廢學中歲卒無成晚

悟盃酒樂苦節因自更軍府酒若海浩蕩波門庭十年
醉如醒遂以善飲鳴陶然今天和萬古達者情

繫丹范丹墓黃流駕長風玉川與金波

近城二酒館名

萬甕傾

弓
月中鯢鱸亦霑醉興與江河通醉鄉總直道世路曲如

遍飲天下酒風味我自得南江與北嶺溜澠不能惑兩
海納一樽巨量吞四塞胷次含春元頌洞和萬國熟醉
即無言百世歸一默

我本醉鄉人，弓旌招我仕。自此樽俎踈，漠然忽喪已。省
治夸了了，枯槁成內恥。况復拘厄途，不得歸田里。十年
猶不字，駸駸踰一紀。日事雖有酒，多病輒自止。強飲終
無歡，忘力徒自恃。

醒眼舉作偽醉時，見天真模糊渾沌初。大朴還其淳，山
中酒初熟。烈烈風味新，一飲平天淵。再飲一齊秦，人物
在眉睫。慘淡飛埃塵，矻矻含瓦石。哀哉為誰勤，遂古有
達者。祇與盃酒親，陶潛豈乞食。有酒即問津，門首佳客

至快漉頭上巾君看飲酒詩始知真醉人

止酒

物各有所止惟止止衆止所嗜止盃酒跌宕乾坤裏好
飲即為徒更不顧妻子無酒則酤我得酒即欣喜日在
醉即眠日出醉未起沈酣三十年落魄誤生理赴詔方
始醒曠然便失已南來增殷憂從此酒止矣愁濃亦如
酒苦海浩無涘何當大刀頭一飲醉千祀

蜡日自釋

氣數方構凶我獨其能和幸有樽中酒自種庭前花自
詠還自酌酬適興亦多且笑勿裂背深衷寄長歌

四時記夢

夢中見西郎綠玉十二峰忽到太行顛故山深長松

擬古九首

陶潛避世士手種門前柳作傳復自序實錄傳永久高
風激余中論世期尚友何當菊花秋共漉山中酒嗟嗟
隨世網願言久已負枯腸充殷憂覽鏡顏益厚會有還

歸日再覓無何有

天地相依附吾道同始終經世維皇綱一王辨華戎聖
人鍾神靈樹立何英雄六經通四時顯顯宏宗風王法
莫有生大統垂無窮本原豈多言萬里祇一中

屋漏闕天人炳烺茲一隅掌中握靈幾宇宙從卷舒日
月驅吾輿乾坤廓吾廬有萬叢吾身通途安廣居私知
生町畦坦夷深榛蕪擾擾趨蹶中跬步無所如

十年不歸山衡麓皆榛荒風雨秋草深蕪沒讀書堂烏

道常矯首天宇青茫茫賜田在河陽經始築圃場黃流
經中天太行面北邙痛飲登平嵩醉眼高昂昂厄風隨
江濱欲去還無方辱井俗死人顧影徒自傷

和龍蟻蝨流瘡膚不復完節旄久零落破碎十年冠片
天亦愧仰計拙祇厚顏音塵兩國絕江深掩重關幽思
搖風旌百感來無端亦有絕絃琴挂壁不復彈忍聞雲
間雁祇恨鏡中鸞槌坐惜日月心死骨重寒

鬼神居無鄉一念即在茲欲知得失初當謹未思時靜

敬守關鑰精一辨澠淄理窮性乃盡天命不復疑君看
語孟書皆是直指辭皇皇三百篇舉要無邪思奈何季
末人忘慮先自欺戴盆還握苗冥行恣所之楚虔方詬
天豈悟祈招詩

憶昔山中春谷風扇微和幽人坐孤石好鳥相和歌冷
泉有清音音響一何多迴復步澗芳有時隨林花田家
攜酒來奈此高興何

幽庭抱枯株感際憶壯遊結交燕趙豪徑欲窮九州岱

宗登日觀赤壁弄江流醉走天山馬叢臺問沙丘中途
輟吾車歷覽猶未周行止不在吾順適安敢求

蓬瀛有奇藥馭風欲載採驚濤忽翻山對面桑田改鯤
化鵬遽起鱗鬣乾半海天池無培風九萬亦有待且搭
垂雲翼運數安得悔

雜詩十二首

縱橫十萬里悠悠總世塵勞生為物役徃徃失此身對
面皆九疑惟有酒相親花開社甕熟春風滿比鄰痛飲

有高矚暮夜達旦晨君看雞窠中豈有百年人

種豆南山歸放目陟高頻雜田似蔬畦繡錯成野景日
夕臥柴荆破屋風露冷床頭有餘醪渴飲興味永月出
流清輝起舞動孤影呼兒讀離騷載酌幽懷騁醉眠踏
曉日獨樂靜中靜

天命端可樂物情孰能量開軒受西風明月照我房悠
然中聖人載酌夜未央哀鴻忽遺音底事昔隨陽遂令
不飲人反側斷中腸

三代祇周孔漢末有佛老汨真復翔偽彞性遂不保涇
渭混濁清原隰易涇燥世多喪心人死病不辨早涓滴
成江河豪末遽合抱六合一榛荒浪走無正道

丹山九采鳳有道即遊豫阿閣與岐山和鳴復高翥一
從休德衰轉翮遽揚去高賢亦違亂好遯有深慮冒出
犯難行宵人肯爾恕幼安遼海居龐公鹿門住翛然遠
世塵豈復有憂懼

展禽黜不去子文無愠喜爭如臥雲窗遠棄人間事淵

明偶束帶初無仕宦意酒熟遽告歸佳期恐難值散髮
山月清濯足溪流駛把菊見南山物我有廢置

大道初坦平奈此世路迫劫灰到重泉兵塵滿阡陌乾
坤一戰場血盡骨更白何處著此身重覺天宇窄獨立
萬物表祇有雲門客弋人忘冥鴻此中是安宅

道人守化根靜境深苞桑單衣不掩胔一食恒糟糠何
心到文繡更不願膏粱真風出樊籠太和蘊元陽中襟
既忘幾外物奚能傷矯矯離羣倫宛在天一方尊中有

奇樂一詠復一觴

西北有佳人飄飄碧雲端
悠悠與神俱冉冉從化遷
偶來住人境結廬青山顛
更不烟火食祇把晨露餐
我欲從之遊路遠縈塵緣
迢然歌紫芝重寄歸來篇

聖作尚簡易古道皆若稽
叔季私煩苛平地生巖崖
生民入罟獲慘慘傷予懷
孰能與蠲除變亂益盈彌
神農設教益庖犧初取離
靡不漏吞舟豈能強骨羈
謀利困管商遂使大質虧

夷則弛炎律廓廓高天涼我作清夜遊步月上河梁蛩
吟烟露根鴈翔風水鄉商聲激孤衷銀漢零飛霜向不
酌酒樽奈此秋興長

溪風吹竹花石壁隨松子山氣清入骨雲嶠時猶倚變
變靜中趣超超物外理

詠貧士七首

簞瓢豈顏樂大聖德歸依曠寂無過地高朗有清暉夸
毗紆金朱志意欲奮飛微偉行險途跋躓終安歸道義

我素飽勢利爾恒飢
鉗空豈足耻心死良可悲

虛室白無塵澹然造羲軒
藜糗一鼓腹春風滿丘園
久雨釜生魚上日厨無烟
琅然金石聲密密道味研
七日無是餒方聞固窮言
貧乃士之常安貧乃為賢

家無儋石儲漫撫無絃琴
淵明果達道遯世求希音
擾劉寄奴戈矛日相尋
豈若一樽酒對菊時自斟
飢來偶乞食當時孰汝欽
獨有桃源人乃見高世心

貧賤人所惡眷眷思黔婁
富貴不可居歸來願言酬
籃

輿向田園嘯歌行道周俯仰澹無營事事即無憂農人
與野叟欣然作朋儔有子復有酒生平復何求

有名不可求有祿不可干干祿當事人此身即屬官豈
辱八尺軀區區為一食道義等芻豢足饜無飢寒冠蓋
不與賜屢空獨稱顏憂道不憂貧高賢多閑關

不食如繫匏無家劇轉蓬尼父道彌高少陵詩益工閑
門張仲蔚知者獨劉龔求志終隱居龐公竟誰同但有
樽中酒何必慮窮通田父邀我飲步月欣相從

落落田子春不負劉幽州竟辭萬戶侯魯連真其儔昔
年過燕山飲馬易水流斯人不復見悵望生隱憂日暮
一樽酒碧雲誰與酬西風薊丘前雁叫踈竹脩

詠二疏

趙蓋楊韓誅見幾當遽去宣帝亦寡恩二疏知所趣眷
禮方未衰解鞅即高舉未幾太子立果然殺蕭傅嗟嗟
二大夫灼見夷險路鈇鉞已在頸富貴其可顧誠者健
其決豈惟常人譽歸來事樽俎鄉社屏世務父子懽有

餘忘懷還澹素韋匡多諫章擾擾渾未悟光禹貪身榮
寧為漢室慮高風獨東海千載道益著

詠荊軻

燕國八百年最為遠秦嬴可作殷周基何乃事荊卿癡
兒彊復讐匕首堪咸京徑刎於期首更圖督亢行
倉皇事不就狼籍斷冠纓寒風死別歌睥睨一世英
不若鱗設諸飲恨復吞聲縱使殺一秦寧無一秦生
呂政方忌燕忍作繞柱驚并吞勢不已舉兵復有名
掃平黃金臺

故鼎入秦庭昔我渡易水晚登燕子城投文弔田疇思
賢重屏營舉事本道義不繫敗與成為國恃刺客夫豈
英豪情

讀山海經十三首 寓興

江風送夕涼蕭蕭齒髮疎種菊滿秋庭偶似淵明廬澹
然絕慮營靜讀窗前書坐馳造聖域氣馬尻為車自得
每厭餘無地容叅蔬重覺洙泗親似與羲皇俱造起幾
天地周身一河圖但恐丁壤運閉物將無如

清泉沃醉面復見桃花顏運甓置齋外尚擬康強年睡
熟如在家詩凡憶歸山偶聞江上鐘忽憶夢中言

伊昔住山時高興薄林丘自許作真逸永結烟霞儔竹
間挂巖月石上鳴溪流不逢塵俗人甘與鹿豕遊

筭心到密地難藏神與陽付我祇一仁藹藹生意長潛
地復經天炳烺生道光羣龍勿使戰每戰雜元黃

道寶人共傳自棄真可憐片言未能充積惡如丘山一
貫有妙理六經皆天言弗知還弗行人生幾何年

天開萬象春生意滿草木好鳥相和鳴嚶嚶出幽谷旭
日露華滋天地一膏沐人心暢達時此理宜自燭
當春對花飲酒面浮花陰藉草幽澗邊野色風滿林三
月鶯亂飛睨睨弄好音一醉臥郊原萬事不到心
世無不樂死得已即命長君看行尸人舉步皆失常狂
生莫攄苗癡叟無休糧節食謹作為壽樂元無央
瑣瑣蒙利徒揭揭事奔走自得乃自失甚勝即甚負身
外皆屬人區中竟誰有配極惟大業方保萬世後

淵明忘世士何必讀山海神仙荒有無怪誕豈真在若
有西王母武皇不終悔歸來當痛飲白衣久已待
怪力與亂神不語有深旨茲生理未窮何暇遠徵死不
須妄云為祇在實踐履過高皆異端中誠足深恃
道衰多散人體亡有放士受命備萬物稟彞各有止方
士欺凡庸異書寧有爾子瞻號通儒亦重抱朴子
嗟嗟蠹書蟲本無經世才鹵莽欲援時逶走遽南來明
月果暗投按劍還驚猜掇患既違時委順庶優哉

聯句漫興


觀星見天體北辰直南極鵬圖亦有待必以六月息九
萬搏扶搖翔翔豈人力君子有天運俟命祇自飭焉用
熬中腸鰈目重反側時來沛然起會矯垂天翼雲遠無
阻修河山改顏色行止各有時作詩為祛惑

桃花源詩

桃花荒有無誰云隔塵世秦人既能往我亦從此逝歸
舟忘津途頻運急興廢緬懷別一天花陰好休憩淳風

無澆誕道種可樹藝凡夫安得到俗駕豈容稅君看閭
閻下聒聒形聲吠苛法如牛毛浮偽競新製高人肯著
足有山皆可詣隱見須適時淺揭深則厲淵明資好遯
棄官在中歲處身向田野曠遠黜智慧把菊祇見山種
秫自為界盃酒與浮沈林樾重蒙蔽到處桃花源真境
不在外當時避秦人未必識妙契

陵川集卷七



總校官候補中書臣吳紹潔

校對官助教臣卜維吉

謄錄監生臣戴珎

謄錄監生臣魏淳耀